

2 Juan

Porrosht aabo tyenij otsahmürye.

¹Yok Juan uje tichew ana hutita. Yok anciano uje tikibey Porrosht aabo. Tichew ana hutita par tokosim erze Porrosht aabo. Wir shi ör itso timcharrza hör uu daabo. Ich tahmür pishi ör, hn ye shi yok nohmirape uje tahmür ör. Nos wir erze uje ochiraha uje ich üru otsahmür ör toy. ²Tahmür ör pork ich üru uje Cristo sahmür eyok hn shish de eyok ahir. ³Sehe tuu eyok Deeych Porrosht hn ir Ijit Jesucristo odosir eyok, hn onuuna uje eyok losuhlaabo hn otakashim eyok hn oduhu eyok aho kiis. Sehe tuu oduhu yahmürloye hn yakashimlo pishye.

⁴Ich uhulo yok aylpa uje tish olak yewo uje oshiyokör uje Porrosht ahwoso tata. Ir ahwoso ich üru.

Ode uje sehe onehnyër Porrosht aabo.

⁵Pishibo watsaklo, wap sehe titim olak par uje ma ahmürloye. Ahnüwo uje tichew titim olak ye ahwoso ahlope. Uje yomsahaloni par eyok Porrosht aabo ichii yuntlo itsorz. ⁶Kimiji yahmürlo Porrosht ich yiyokörlo uje ire tata. Entlo wapni erze uje Porrosht sahmür uje ahakörlo, wichi uje tyenij yahmürloye ⁷pork ich okihniya uje ofir lekityo shi par uje otsehnyër oso. Wir otsotiis Jesucristo uje tirètni hn shürha hnakirap. Uje yeëk tata shuu itsorz ich shi sehe nehnyër oso. Wichi Cristo ir imäha. ⁸Abeylship olak par uje ye onehnyër olak hn oduhu olak premyo pyerte. Ich asilo obiyo ich kihniya par erze premyo uje Porrosht tyenij ishim olak nehe. Ye uhulo erze olak premyo pyerte hni pikaap.

⁹Uje yeëk sowe uje Cristo tata ich chimehi. Ye niyokörpe uje tatim ire. Wichi ye diraha Porrosht iluupe, per erze uje oshiyokör uje Cristo tata ochiraha Porrosht iluu hn ochiraha Cristo iluu. ¹⁰Uje yeëk tir olak hn sanimiräha ahwoso uje ye ilo Cristo ir ahwospe ich ye uhu lakaha olak ihyuch. Ye atimlo ire par uje Porrosht takashim ire ¹¹pork uje yeëk tatim ire shuu itsorz ich takashim wichi shiyokör erze ir ibiyo uje ich mihnüwo.

Porrosht aabo yewo nos oshim ör saludo.

¹²Kuche kihniya de uje sehe titim olak per ye tahmür tichewpe tibite hutita. Sehe takaha titir olak par uje yikitkërloye heke ich eyoklo aylpa. ¹³Nos wir Porrosht aabo uje ode lika pahir oshim olak saludo. Porrosht chiihla örne. Shi ahnüwo uje sehe titim olak.